

# Pablotenipa Tesaronicadenidsa ima teppe dsotodecca dosse quinajaro

## 2 Tesalonicenses

Tesaronicapi dsama Masedoniacca odsa panani. Nahicca madija mota huapi taha Jesodsa jehe quinajari. Poccadeni quequeriqqui cajimanajari. Pablopa najaro odsa pananidsa tahide Jesocristo tahimari icassiejeranijinecca mari icanabaquipojari. Naraha toccahi nattipa mamaride ohuahadeni ima pajissa jeranicca mari icanabaquimanajari. Poccadeni marinajapi: –Jesocristo ccanipomajari –quinahi nade.

Najarojine Pablo, Silvano, Timoteo tedseje Tesaronicadenidsa ajijaro ima dsodo quinajaro, Jeso ccanihicca ima pajissara nahatoqqiri nahijine. Ajaropi poccadeni ima teppe dsotodecca pohuadenidsa dosse quinajaro.

### Pablotenipa nija quinajari

**1** <sup>1</sup>¿Nija imecotedeni? Ohua Pablo, Silvano, Timoteo inadsa tiadenidsa dsodo inajaro. Nani odsa panani Tesaronicacca Jesocristodsa titiqueriqqui najaro icca Abi Dio, ia Medsede Jesocristo pohuadeni pamahadsa tijariquimanajarodsa icca ima dsodo inajaro.

<sup>2</sup>Abi Dio, ia Medsede Jesocristo pohuadeni pamaha tiadenidsa ima bicani, poccadeni jonehe naqui tiadenidsa inanamana-dsanapona, inajaro.

### Jesocristo ccanipomadsapa ima ajima nanitohui

<sup>3</sup>Imecotedeni, ticcadeni ima bica tadsapi titohuideni Diodsa huati huati ihanajaro: –Jehe Abi Dio, bica tani. Imecotedeni Tesaronicahuaji madimanajaridenicca

ima bica tadsa Tiadsa etidsejaro –ihinanajaro. Nema inanipi bica tani. Aji ticcadeni jeheniji Jesocristodsa todacorani-dsanaponicca ima imittani. Tetideni cahanerara canehe denima denima tidsanapomananicca ima naqui imittani. <sup>4</sup>Nadsapi titahimarideni Diocca madija quequeriqqui-ridsamana najaridenidsa huati huati ihanaridsa najaro. Ajima inajaro: –Tesaronicahuajicca imecotedeni Jesocristodsa jehe quinahissa tajari. Aja madija Jesocristodsa jiperaqqiri najari huadierideni pohuadenidsa ssonari ssonari nadsa naqui mohuaradsa inahanamana inahanamana najaro. Ocasserani ahuamanaraha Jesocristodsa disseraqqiri nahi –ihinaridsa najaro. <sup>5</sup>Jehe, nanajidso tiquejenaraha aji nanajidso tiquejenajarodsa Dio Pahuapa ima cattedmade pajirahissa tajari ahuato

inananitohui. Nidsa huapimacca ima cattemade tojadsapa tiadenidsa: –Occa cacahuehedsa tiquejenana –nahitohui. Nadsama tiadenipi najarotohui najidsohue mohuaradsa titinahanamana najaropaji.

<sup>6</sup>Nidsa dsotode tiadeni najidso-depa Dio inajidsobaqquihitohui. Nema nadsapi madija tiadenidsa tabaccorehe inanamanajaro manaconi Dio inapajiranissa tanitohui. <sup>7</sup>Aji ocasserani temana-jaropi Dio tiadeni jassi tonana-baqquihitohui. Ia naqui Diojine nema inanitohui. Najaro jassinajacca imapi nidsa ia Medsede Jesocristo memehuaji nebodsa nami-huaji ccaronapomadsana iadsa tojanitohui. Puhuapa pocca dodosse tabaqqi dacoraqqiri najarideni tedseje jororoni imenima ccaronapomahitohui. <sup>8</sup>Nadsapa madija inajidsobaqquihitohui. Aja madija Diodsa noccodeni jidsaqqiri najarideni, aja ia Medsede Jesocristo tahimari icassiejeranijineccadsa iboqqiri najarideni naco inajidsobaqquihitohui. <sup>9</sup>Ia Medsede bacco nanidsapa poccadeni imasiri manaconi \*najidsohue jiquejera-nihuaji madimana-dsanapohuitohui. Ia Medsededsa huajiqqiri nadsa madimanahijine Dio dosse inabaqquihitohui. Nadsapa Jesocristocca deni tojehe, pohua dsibehine, pocca nahatohue qqui toquina-jarahitohui. <sup>10</sup>Naraha ia Medsede namihuaji ccaronapomadsapa pocca madija huapima pohuajine imarideni tobicajarideni pohuadsa: –Jehe, tiapi bica tinani, deni tijani –quinaja, huahaha huahaha canaja nahitohui. Aja Jesocristo pohuadsa pajissa quinajari huapima pohua

qqi toquinadsapa: –A, ia Medsede dacorajari, bica tahi –quinahitohui. Nadsapi aji tiadeni naqui Jesocristo tahimari tiadeni mari icanabaqqi-pojarods pajissa tiquinajarojine pohuadsa tetidsemananitohui.

<sup>11</sup>Ajjaro ima huapima tiadenidsa tojanijine Diodsa huati huati ihinanajaro. Dio ticcadeni madie qqui tadsapa: –Occa huahua tabaqquinajapa ohuadsa disseraqqiri nahi. Ponima pohuadenidsa huahua onejerajaro –nahijine inadsa Diodsa huati huati ihinanajaro. Ima bicani tinamananijine tohuini tiquinadsa naqui Dio pocca dacorehema ticcadeni ima bica tanijine inadsa Diodsa huati huati ihinanajaro. Diodsa jehe tiquinajarojine Puhuadsa tidsepedeni ihijimana najaro naqui ticcadeni ima toccanissa tanijine inadsa Diodsa huati huati ihinanajaro. <sup>12</sup>Nadsapi ticcadeni ima bicani nema tinamanajarojine ia Medsede Jesocristo tahimari madija mittamanadsapa: –Jehe, pocca ima dacorani. Pocca nahatohue naqui pocca madijadsa qqui inani –quinahitohui. Manaco Jesocristo tiadenidsa: –Bicaqqiri tiquinani, occa madija tiquejenani –nahitohui. Jehe icca Dio, ia Medsede Jesocristo tedseje titohuideni huatideni cahanarimana canajarijine tiadeni tonapajira-baqquihissa tajaripaja.

#### Imasiri ssebote ahuatomahicca ima

**2** <sup>1</sup>Nadsama imecotedeni, ia Medsede Jesocristo ccanipomahicca ima, pohuadsa iqueriqquini-jinecca ima naqui tibodideni huatomanissa taji, tibodideni

tossamo-jeranijine. <sup>2</sup>Paji, aji Jeso-cristo ccanipomahicca ticahattera-pojaropi tinebomana tejeraji. Aja madija attidenipa: –Ia Medsede ccanihicca huadapi bacco tani, bacco tani –quinadsapa tijabojo-manajeraji. –Dio Corimejine nahatoto inani –quinahitide naraha pohuama huati toquinajari. –Pablocca ima teppedsa qqui inade –quinadsa naco pohuadeni attidsa pajissa tiquinejeraji. Ohuapi najaro ima dsodo onejerade. <sup>3</sup>Imecotedeni, madija tiadeni tocamaidساباqqi-manadsa pohuadeni attidsa pajissa tiquinejerana. Nidsa ia Medsede ccanipomahicca huada bacco tejeraccadsama madija huapi taha Diodsa iboqquri napohuitohui. Mohuaniji idimamanaridsa-dsapa aja madija imasiri ssebote ahuatomahitohui. Naraha najaripa nidsa Diocca najidsohue jiquejerenihuaaji tojahitohui. <sup>4</sup>Aja madija imasiri ssebote pa Diodsa huadi, aja Dio jararaha –Ia cacahuade –quiquinanajaridsa huadi, aja madija poccadeni nahatonijidsa huahuatidsemana najaridenidsa naco huadi tahitohui. Nadsama aja imasiri ssebote mamaisade attipa: –Ohuana deni ojani, ojari onani –nanaja nahitohui. Nadsapa Diodsa dada toqqimahuaji toqqe-dsimadsa huittaridsapa: –Ohuana Dio ojani –nahitohui. <sup>5</sup>Tiadenidsa omadipods najaro ima tiadenidsa huati huati onapojaropi ¿tetideni ajimamanajaroqui?

<sup>6</sup>Tiadenipi nahatoqquri tiquina-poni, aja imasiri ssebote ahuato-jaraccasihijine cacahuadepa madihi. Ahuatomahijinecca huada bacco tejeraccadsapi cacahuadejine

ahuato-jaraccahi. <sup>7</sup>Naraha pocca ima tabaccora tanicca ahuatora taraha pohuajine madija huapi taha imasiri ihinahanamana nani qqui qqui idsanapojaropaji. Naraha imasiri deni toja-jeraccasihijine cacahuadepa Diocca dosseniji madiccai. Jidapana imasiri denima toja-jeranijine pohuana huacossajari. Naraha nidsa dsotode najari cacahuade Dio iaccamacossanidsa toccanidsapa imasiri denima ahuatomanitohui. Nadsapi ima oppina tehe tojaridsanitohui. <sup>8</sup>Nadsana imasiri ssebote ahuatomahitohui. Naraha dsotodepa ia Medsede Jeso-cristojine jicahitohui. Jesocristo pohua dsibehinema, pocca dacorehema ccaronapomadsapa pohua ajaridsa jappo nadsa inanadsoquehitohui. <sup>9</sup>Aja imasiri ssebote ahuatojaripa Satanacca dosseniji. Puhuapa Satanacca dacorehe cajijari. Pocca imadsa madija pajissa quinahijine canahatori canaraha maidsehe. <sup>10</sup>Imasiri onihidsa onihidsa ihicamaidساباqqi nahitohui. Nadsapa madija najidsohuedsa toquejenahijinedenipa pocca imatohui disseraqquri nahitohui. Jesocristo tahimari pajissaccadsa pajissa quinadsapa tocassiejerahijineraha ima pajissaccadsa jiperaqquri najari. <sup>11</sup>Najarojine Dio inebobaqquidsapa imasiri ssebote icamaidساباqqi hitohui. Nadsapa pocca maidsehedsara pajissa quinahitohui. <sup>12</sup>Madija huapima ima pajissaccadsa pajissa quina-jarajarideni imasiridsa disseraqquri nadsapa Diojine najidsohuedsa toquejenahitohui.

**Dio tiadenidsa huati  
cahanari canajaria aji  
ticassiejeraropaji**

<sup>13</sup>Naraha imecotedeni, ia Medsede pa tiadenidsa huati huana

tajari. Titohuideni huajjiradsa Diodsa huati huati ihinanajaro. Pohnadsa: –Abi Dio, Tesaronicadenidsa ticca ima tojadsapi bica tani –ihinanajaro. Diopa tahide ticassiejeranijine tiadeni tocatteljidsabaquipojaria aji ticassiejerajaropaji. Nadsapa Dio Corime tibodideni tonahiredsa, aji Jesocristo tahimari pajissaccadsa pajissa tiquinadsa naqui Diojine ticassiejerajaropaji. <sup>14</sup>Nadsapa Jesocristo tahimari icassiejeranijinecca tiadeni mari icanabaquidsapi timittamanajarode. Najarods Diopa titohuideni huahua najari. Nidsa dsotodepi aja ia Medsede Jesocristo pohua dsibehine, pocca deni tojehe tiadenidsa tojanitohui.

<sup>15</sup>Nadsapi imecotedeni, Diodsa jehe tidsanapomananijine dissessera tinaji. Tiadeni mari icanabaquijarocca, tiadenidsa dsodo inajarocca naqui tetideni ajimamana tejeraji, onajaro.

<sup>16</sup>Nadsama aja ia Medsede Jesocristo, Abi Dio tedseje iadsa huatideni huanana tajari. Pohnadeni pamaha bicaquiqui nadsa ibodi acco acco totocamabaquimana dsanapojaripaja. Pohnadenijine itedsejemacca ima bicani iadsa tojanijine nahatoquiqui inehe imadjaropaji. <sup>17</sup>Pohnadeni pamahapa tibodidenidsa huatidsehe inanaridsamananijine, inajaro. Pohnadenijine tibodideni todacorani nadsapi tettideni bica tanicadsara huati huati titiquina nanijine, ima bica taniccara tidsepedeni ihijiridsamana nanijine, inajaro. Jehe, najaro ima tiadenidsa tojanijinepi Diodsa huatide inebo-jerajaro.

### **Itohui Diodsa huati huati titiquina naji**

**3** <sup>1</sup>Jari, imecotedeni, itohui Diodsa huati huati titiquina naji, aji ijine amadsati ia Medsede Jesocristo tahimari icassiejeranijinecca tojaribaququinijine, inajaro. Pohna tahimari mittaridsamanadsapa: –Jehe, jidapapi iadsa ima bica tani –nanaridsamana nahijine, inajaro. Pina aji tiadenidsa Jesocristo tahimari bacco tapods jehe tiquinapojarossa nanijine, inajaro. <sup>2</sup>Ajjaro ima naqui Diodsa huati huati titiquina naji, aja madija tabaccoraquiqui najarideni, madija Diodsa iboquiqui najarideni naco ia tonajidsobaquiquijarahijine, inajaro. Aja Jesocristods jehe quina-jarajaridenipa caji tahi. <sup>3</sup>Naraha ia Medsede tiadeni tonebobaquiqui-jarahi. Pohnuapa tiadeni tonadacora-baquiqui-hitohui. Pohna naco tiadenidsa imasiri jinede deni toja-jarahijine tiadeni tohuacahua-baquiqui-hitohui. <sup>4</sup>Nadsama icca marinajassa tinamanani ia Medsede ecahuajaropi nahatoto inajaro. Ia Medsedejine nema tidsanapomananijine naqui nahatoto inajaro. <sup>5</sup>Ia Medsede tiadeni tonahattabaquidsa Diodca tohuati huanehe tibodidenidsa ahuato tanijine jipapa inajaro. Tiadenidsa ocasserani ssonaridsa mohuaradsa tinahanamananijine ia Medsede Jesocristo pocca dacorehe tiadenidsa inananijine naqui jipapa inajaro.

### **Madija dsepe ijidsana bica tani**

<sup>6</sup>Imecotedeni, ia Medsede Jesocristo onima tiadenidsa dsodo

inajaro. Aja timecote Jesocristoccaraha dsepe ijihijine jipera tahi qqui tiquinadsapa pohua tedseje ticabera tejeraji. Pocca madie pina icca marinaja tiadeni mari icanabaquipojarossa nejeradsapi tiadenidsa quejema-jarana, inajaro. <sup>7</sup>Nadsama pina aji icca madiessa tinanamannijine naqui nahatoqquiri tiquinani. Nani tiadenidsa imadidsapi idsepe ijirani imadini qqui tiquinejerade. Idsepe ijidsanapode. <sup>8</sup>Ticcadeni dsamatapa ihijipa najari naco manaconi jiraha ihijipa najarade. Itapari manaconidsa mita inahijine inadsapi tarabidsa inajaro. Aji ssiaja, dsome naqui idsepe ihiji najaropajide. Tiadenidsa najo tejernijine nema inajarode. <sup>9</sup>Aji Dio Atti tiadeni mari icanabaquijarojine ticcadeni da naqqinajatohui, ticcadeni dsamatapatohui tiadenidsa huati inadsa bica taraha nema inejerajaro. Idsepe ihiji najarodsa manaconi ihicaji najarode. Nadsapi idsepe ihiji nani qqui tiquinadsapi tiadeni naqui nema tiquinannijine, inajaro. <sup>10</sup>Nadsa tiadenidsa imadipodsa etti ajima ihinanade: –Madija dsepe ijihijine ibo tajaripa jipa-jarana. Pohua –ihinanade.

<sup>11</sup>Nadsama iapi aji tiadenihuaji timecotedeni pamahapa: –Tarabai-dsarahi madimanajari –quinahi imittani. –Boronidsara ahuaaji totohueda taja naridsajari. Odsadsa naco tohuedesimaja naridsapohui nanaja najari. Imara maji tohuuaccamana nahi –quinahi ima imittani. <sup>12</sup>Naraha pohuadenidsa icca ima dosse inajaro. Ia Medsede Jesocristo onima

tiadenidsa huati inajaro: –Ponima jai tijaridsa-jeraji. Timadimannijineccatohuira tidsepedeni ihijimana naji –inajaro.

<sup>13</sup>Naraha imecotedeni, tiadenina ima bicani tinanamanajarodsa: –Najo tani, onebona –tiquinejerana. <sup>14</sup>Nadsama timecotedeni ojari itide, pama itide, icca marinaja dsodo inajarodsa ibobo tajari tiadenidsa queriqquidsapa tinocodsa-baqquimanajo. Nama quinajaridenipa titohuimana tajarajo. Nahi tinoppinedeni cappinahijine. <sup>15</sup>Naraha najaripa ticcadeni huadi toja tajarajo. Pohuapa timecotedeni. Pina madihissa tahijine bodi acco ticamamanajo.

–**Diocca jonehera tiadenidsa tojaji –quinajari**

<sup>16</sup>Ia Medsede pohuapa jonehe jinede. Tiadenidsa ima ssonaridsa, ima nohueradsa naqui Diocca jonehera tiadenidsa tojadsanapona, inajaro. Diopa tiadeni tohuacahua-baqqui-dsanapohuitoahui, inajaro.

<sup>17</sup>Jehe, ohua Pablo, ajijaropi ohua odsepedsa dsodo onajaro. Ajaropi jicanicca tiadenidsa nija onajaro. Aji occa ima teppe huapimadsa nema onanaridsajaro. Occa dsodoniji qqui tiquinadsapi: –Jehe, pajissa, ajijaropi Pablocca ima teppe –tiquinannijine, onajaro.

<sup>18</sup>Ia Medsede Jesocristopa tiadeni huapimadsa ima bicani inanana, inajaro. Pajissa imapi nema nani. Epejeni icca ima. Ia onipi Pablo, Silvano, Timoteo tedseje.